

NASSIMA AL-SADA **SÁDI-ARABÍA**

# FANGELSUÐ FYRIR KVENRÉTTINDABARÁTTU



**PITT NAFN  
BJARGAR**

**LÍFI**

## INNGANGUR AÐ MANNRÉTTINDUM

# ÞITT NAFN BJARGAR LÍFI

Herferð Amnesty International **Þitt nafn bjargar lífi** er haldin árlega á eða í kringum alþjóðlega mannréttindadaginn, hinn 10. desember. Þann dag var Mannréttindayfirlýsing Sameinuðu þjóðanna samþykkt, árið 1948, fljótlega eftir stofnun Sameinuðu þjóðanna. Herferðin hefur það að markmiði að koma á raunverulegum breytingum í lífi fólks og samfélögum sem hafa þjáðst eða eiga á hættu að verða fyrir mannréttindabrotum. Meðal þeirra fjölmörgu aðgerða sem gripið er til í herferðinni er að koma á framfæri einstaklingsmálum til þeirra sem hafa ákvörðunarvald og geta haft áhrif á breytingar, vekja athygli á málunum með skipulagningu mótmæla og aðgerða og ná alþjóðlegri athygli í gegnum fjölmiðla og á netinu.

Einn stærsti hluti herferðarinnar **Þitt nafn bjargar lífi** felur í sér bréfaskrif milljóna einstaklinga úti um allan heim og þökk sé slíkum aðgerðum dynja bréf á opinberu embættisfólki. Málin í ár snúa m.a. að fólki sem hefur verið fangelsað fyrir það eitt að standa vörð um mannréttindi og nýta tjáningarfrelsi sitt,

hinsegin baráttufólki sem hefur orðið fyrir aðkasti fyrir að vera það sjálft, friðsamlegum mótmælendum sem hafa verið beittir ofbeldi og umhverfisinnnum sem hafa sætt ofsóknum og hótunum. Þolendur mannréttindabrota fá stuðningskveðjur frá þúsundum fólks í fjarlægum heimshornum. Þolendurnir og fjölskyldur þeirra vita að vakin er opinber athygli á málum þeirra og að þeir eru ekki gleymdir.

Árangur sambærilegra herferða fyrri ára hefur verið sláandi. Einstaklingar sem hafa orðið fyrir mannréttindabrotunum segja frá breytingunni sem þessi bréf höfðu í för með sér. Þeir lýsa yfir þakklæti til þeirra sem hafa skrifað og greina frá styrknum sem þeir finna frá öllum þeim sem láta sig mál þeirra varða.

Oft er hægt að sjá verulegar breytingar á framkomu embættisfólks gagnvart þolendum mannréttindabrota í kjölfar herferðarinnar: ákærur eru felddar niður, meðferð mildast og lög eða reglugerðir sem taka á vandamálinu eru kynnt til sögunnar.

Kynntu þér málin í ár á  
[www.amnesty.is](http://www.amnesty.is)

Hafðu samband fyrir frekari  
upplýsingar:  
[amnesty@amnesty.is](mailto:amnesty@amnesty.is)

Tístu og taggaðu  
@Amnesty á Twitter og  
sýndu stuðning með  
myllumerkjunum #W4R20  
og #ÞITTNAFN

## MANNRÉTTINDAFRÆÐSLA

# ÁÐUR EN ÞÚ BYRJAR

Hægt er að nota þetta verkefni í fjölbreyttu umhverfi fyrir ýmsa hópa, t.d. í skólastofunni, félagsmiðstöðvum, með fjölskyldunni, í hópi baráttufólks fyrir mannréttindum og á netinu. Leiðbeinendur geta aðlagð efnið eftir þörfum og kringumstæðum hvers hóps. Sem dæmi gæti verið gagnlegt að kanna þekkingu þátttakenda á málefnum, huga að hvað henti best miðað við fjölda þátttakenda svo allir fái tækifæri til að vera virkir þátttakendur og mögulegum hindrunum. Þegar þátttakendur grípa til aðgerða er mikilvægt að ræða hvort það sé öruggt fyrir hvern og einn og þá af hverju eða af hverju ekki.

Verkefnin eru öll ætluð virkri þátttöku þátttakenda sem kanna, ræða, greina og spyrja spurninga um málefni en eru ekki einungis mataðir á upplýsingum. Þessi aðferðafræði er

kennslufræðilega mikilvæg þar sem þátttakendur:

- **Þróa** lykilfærni og -hæfni
- **Fá tækifæri** til að mynda eigin skoðun, bera upp spurningar og öðlast dýpri skilning á málefnum
- **Taka ábyrgð** á sínu námi og móta umræður í tengslum við áhugasvið, hæfni og áhyggjuefni
- **Fá rými** fyrir tilfinningar sínar og að móta sín eigin viðhorf



Nemendur og kennarar í Tævan skipuleggja viðburði í tengslum við **Þitt nafn bjargar lífi** árið 2019.

© Amnesty International Taiwan

## GÓÐAR FRÉTTIR ÚR ÞITT NAFN BJARGAR LÍFI 2019 ÞÍN ÞÁTTTAKA SKIPTIR MÁLI

### DÓMUR MILDAÐUR Í ÍRAN

Árið 2019 var Yasaman Aryani dæmd í 16 ára fangelsi fyrir að dreifa blómum, án höfuðslæðu, til almennings á alþjóðadegi kvenna hinn 8. mars 2019. Í febrúar 2020 var fangelsisdómurinn stytur talsvert. Það má meðal annars þakka þeim 1,2 milljónum skilaboða, um lausn Yasaman, sem send voru írönskum yfirvöldum alls staðar að úr heiminum. Við höldum áfram baráttunni þangað til Yasaman hefur verið leyst úr haldi.



„Við sameinumst fólki um heim allan til að berjast gegn óréttlætinu.“

Crystal Swain, Grassy Narrows



### BÆTT HEILBRIGÐISÞJÓNUSTA FYRIR GRASSY NARROWS- SAMFÉLAGIÐ



Íbúar Grassy Narrows-samfélagsins urðu illa fyrir barðinu á kvikasilfurseitrun eftir að stjórnvöld á 7. áratugnum leyfðu verksmiðju að losa 10 tonn af úrgangi út í ána á svæðinu. Yngri kynslóðir hafa sérstaklega fundið fyrir afleiðingunum og verið í fararbroddi í baráttunni fyrir heilbrigðri framtíð. Eftir áralanga töf ákváðu kanadísk stjórnvöld loks í apríl 2020 að veita 19,5 milljónir dollara til uppbyggingar sérhæfðrar heilsugæslu fyrir þolendur kvikasilfurseitrunar í Grassy Narrows-samfélaginu.




### DAUÐADÓMUR YFIR BARNI ÓGILTUR Í SUÐUR-SÚÐAN

Magai Matiop Ngong var aðeins 15 ára þegar hann var dæmdur til dauða, en þökk sé fólki eins og þér var dauðadómurinn ógiltur í júlí 2020. Rúmlega 765 þúsund einstaklingar um heim allan gripu til aðgerða og kölluðu eftir því að lífi Magais yrði þyrmt. Og það tókst!

„Kærar þakkir fyrir stuðninginn. Ég er orðlaus. Þið hafið ekki hugmynd um hversu mikilli hamingju hjarta mitt er fyllt nú.“

Magai Matiop Ngong



## INNGANGUR AÐ MANNRÉTTINDUM

# UM MANNRÉTTINDI

Mannréttindi eru grundvallarréttindi og réttarvernd sem hvert og eitt okkar á tilkall til. Mannréttindi byggjast á meginreglum um mannlega reisn, jafnrétti og gagnkvæma virðingu óháð aldri, þjóð-erni, kyni, kynþætti, lífsskoðunum og persónulegri afstöðu.

Sem manneskja átt þú rétt á að komið sé fram við þig á sann-  
gjarnan hátt og þér ber einnig að koma fram við aðra af sanngirni. Þú átt einnig rétt á ákvarðanatöku um eigið líf. Þessi grundvallar-  
mannréttindi eru algild – þau eru réttur okkar allra, allra sem heiminn byggja. Þau eru óafsalanleg – enginn getur tekið þau frá okkur. Þau eru líka óskiptanleg og tengjast innbyrðis – allir þættir hafa jafnmikið vægi og eru tengdir hver öðrum.

Í kjölfar þeirra grimmdarverka sem framin voru í seinni heims-  
styrjöldinni urðu til alþjóðleg lög um mannréttindi, á grundvelli Mannréttindayfirlýsingar Sameinuðu þjóðanna. Þau hafa myndað trausta undirstöðu fyrir landsbundin og svæðisbundin lög og er ætlað að bæta líf fólks um heim allan. Yfirvöldum á hverjum stað ber að líta á mannréttindi sem gildandi lög. Þau leggja yfirvöldum og ríkisstarfsfólki þær skyldur á herðar að virða og verja rétt þeirra sem undir lögsagnarumdæmi þeirra heyra, sem og á öðrum svæðum.

## Mannréttindi eru ekki munaður sem fólk fær aðeins að njóta þegar aðstæður leyfa.



Meðlimir Amnesty International í Tógó taka þátt í **Pitt nafn bjargar lífi** árið 2019. Á hvert hvetja þeir fólk um allt land til þátttöku.

© Amnesty International Togo



## INNGANGUR AÐ MANNRÉTTINDUM

# MANNRÉTTINDAYFIRLÝSING SAMEINUÐU ÞJÓÐANNA

Mannréttindayfirlýsing Sameinuðu þjóðanna var mótuð af Sameinuðu þjóðunum á fyrstu árum stofnunarinnar, strax í kjölfar seinni heimsstyrjaldarinnar. Frá árinu 1948 hefur hún verið grundvöllur alþjóðareglna um mannréttindi. Öll ríki heims hafa samþykkt að þau skuli vera bundin af þeim almennu meginreglum sem lýst er í 30 greinum þessa skjals.

Mannréttindayfirlýsing Sameinuðu þjóðanna er, eins og nafnið gefur til kynna, yfirlýsing. Hún er viljayfirlýsing af hálfu allra ríkisstjórna, um heim allan, um að virða tilteknar reglur og staðla er varða meðferð á og framkomu við mann-  
eskjur. Mannréttindi eru hluti af alþjóðalögum. Allt frá því að Mannréttindayfir-  
lýsing Sameinuðu þjóðanna var samþykkt hafa fjölmörg önnur bindandi lög og samþykktir verið gerð á grundvelli þeirra meginreglna sem í yfirlýsingunni er að finna. Það er á grundvelli slíkra laga og samþykktar sem samtök á borð við Amnesty International krefja yfirvöld um að hætta að beita illri meðferð af þeim toga sem þolendur í herferðinni **Pitt nafn bjargar lífi** hafa upplifað.

## INNGANGUR AÐ MANNRÉTTINDUM

# MANNRÉTTINDAYFIRLÝSING SAMEINUÐU ÞJÓÐANNA



### BORGARARÉTTINDI OG FRELSI

Réttur til lífs, frelsi frá pyndingum og þrældómi, réttur á að sæta ekki mismunun.

1. grein Allir eru fæddir frjálsir og jafnir
2. grein Bann við mismunun
3. grein Réttur til lífs, frelsis og mannhelgi einstaklinga
4. grein Frelsi frá þrældómi
5. grein Frelsi frá pyndingum



### LAGALEGUR RÉTTUR

Réttur til að teljast saklaus uns sekt er sönnuð; réttur til réttlátrar málsmeðferðar fyrir dómi, réttur til að njóta frelsis frá geðþóttahandtökum eða farbanni.

6. grein Allir skulu njóta verndar með lögum
7. grein Allir skulu vera jafnir fyrir lögum
8. grein Lagaleg úrræði þegar mannréttindi eru brotin
9. grein Bann við ólögmetu farbanni, fangelsun eða brottvísun
10. grein Réttur til réttlátrar málsmeðferðar fyrir dómi
11. grein Saklaus uns sekt er sönnuð
14. grein Réttur til að fara til annars lands og leita verndar



### FÉLAGSLEG RÉTTINDI

Réttur til menntunar, til að stofna fjölskyldu og annast hana, til tómstundar, réttur á heilsugæslu.

12. grein Réttur til einkalífs, heimilis og fjölskyldulífs
13. grein Frelsi til að búa og ferðast hindrunarlaust innan landamæra ríkja
16. grein Réttur til að ganga í hjónaband og stofna fjölskyldu
24. grein Réttur til að njóta hvíldar og afþreyingar
26. grein Réttur til menntunar, þar með talinn réttur til gjaldfrjálsrar grunnmenntunar



### EFNAHAGSLEG RÉTTINDI

Eignarréttur, réttur til að vinna, til húsnæðis, til lífeyris, til fullnægjandi lífskjara.

15. grein Réttur til ríkisfangs
17. grein Réttur til að eiga eignir
22. grein Réttur á félagslegu öryggi
23. grein Réttur til að vinna fyrir sanngjörnum launum og ganga í stéttarfélag
25. grein Réttur til lífskjara sem tryggja heilsu og velferð



### STJÓRNMÁLALEG RÉTTINDI

Réttur til að taka þátt í stjórn lands síns, greiða atkvæði, koma saman með friðsömum hætti, frelsi til tjáningar, lífsskoðunar og trúarskoðunar.

18. grein Réttur til lífsskoðunar (þar með talin trúarskoðun)
19. grein Tjáningarfrelsi og réttur til að miðla upplýsingum
20. grein Frelsi til að ganga í félagasamtök og halda fundi með friðsömum hætti
21. grein Réttur til að taka þátt í stjórn lands síns



### MENNINGARLEG RÉTTINDI, RÉTTINDI TIL SAMSTÖÐU

Réttur til þess að taka þátt í menningarlífi samfélagsins.

27. grein Réttur til þess að taka frjálsan þátt í menningarlífi samfélagsins
28. grein Réttur til alþjóðaskipulags þar sem öll ofangreind réttindi eru framkvæmd
29. grein Skylda til að virða réttindi annarra
30. grein Ekki má svipta neinn neinum þessara réttinda!



## VERKEFNI

# KVENRÉTTINDI

### LYKILHUGTÖK

- Baráttufólk fyrir kvenréttindum
- Réttur til frelsis
- Réttur til réttlátrar málsmeðferðar fyrir dómi
- Tjáningarfrelsið
- Einangrunarvist
- Kvenréttindi

### UM ÞETTA VERKEFNI:

Eftir að þátttakendur læra um þau mannréttindabrot sem Nassima al-Sada hefur sætt eru þeir hvattir til að grípa til aðgerða til stuðnings málstað hennar fyrir kvenréttindum.

### LENGD:

60 mínútur

### ALDUR: 14+

### MARKMIÐ:

- Þátttakendur læra um forráðamannakerfið í Sádi-Arabíu og aðstæður varðandi réttindi kvenna
- Þátttakendur greina mannréttindabrot sem Nassima al-Sada, baráttukona fyrir kvenréttindum í Sádi-Arabíu, hefur sætt
- Þátttakendur kynnast herferðinni **Þitt nafn bjargar lífi** og geta gripið til aðgerða til stuðnings málum herferðarinnar

### UNDIRBÚNINGUR:

- Eintök af spjaldi um mál Nassimu (sjá bls. 11)
- Eintök af Mannréttindayfirlýsingu Sameinuðu þjóðanna (sjá bls. 5)
- Eintök af lista yfir mannréttindabrot í máli Nassimu al-Sada (sjá bls. 10)
- Pennar/blýantar/yfirstrikunarpennar og pappír til að teikna og skrifa

## 1 MÍN ÁKVÖRÐUN – MITT LÍF

Þátttakendur eru beðnir að teikna mynd af blómi með fimm eða sex stórum krónublöðum. Næst eru þeir beðnir að skrifa það sem þeim **þykir mikilvægt að geta tekið eigin ákvarðanir um** inn í hvert krónublað. Þetta getur til dæmis verið hverju þeir klæðast, hvað þeir eru að læra, hvaða tónlist þeir hlusta á, hverjir eru vinir þeirra, hvaða áhugamál eða íþróttir þeir vilja stunda, í hvað þeir eyða peningunum sínum, hvað þeir gera í frítíma sínum, með hverjum þeir eru í sambandi, hvað þeir lesa o.s.frv.

Þegar allir hafa klárað að skrifa inn í sitt blóm eru þátttakendur beðnir að lesa upp hlutina sem þeir skrifuðu niður, þeir eru einnig skrifaðir á töflu svo allir sjái. Nýjum atriðum er bætt við listann jafnóðum.

Næst fara þátttakendur yfir listann og ræða eftirfarandi spurningar með öllum hópnum:

- Hvernig líður ykkur þegar þið getið ekki ákveðið eitthvað sjálf?
- Hvernig myndi ykkur líða ef einhver annar fengi ábyrgð á því að samþykkja eða samþykkja ekki ákvarðanir sem ykkur finnst mikilvægt að þið takið sjálf?
- Stjórnar kyn einhverju á Íslandi þegar kemur að ákvarðanatöku fólks?

## 🕒 10 MÍNÚTUR

*Þátttakendur geta hugleitt hvernig þeim líður þegar foreldri eða forráðamaður tekur ákvarðanir sem þeim finnst að þeir eigi að taka. Það er mikilvægt að þessi æfing snúist ekki um hvort foreldrar eigi að taka ákvarðanir fyrir ungt fólk, heldur frekar hvaða áhrif það hefur þegar einhver tekur ákvörðun um þitt líf sem þér finnst mikilvægt að þú takir sjálf/ur/t.*



## 2 FORRÁÐAMANNAKERFIÐ

🕒 10 MÍNÚTUR

Útskýrt er að svör konu í Sádi-Arabíu við spurningunum hér á undan, án tillits til aldurs, geti verið mjög ólík þeirra svörum. Forráðamannakerfið þar í landi krefst þess að allar konur séu með löglegan forráðamann, karlmann (faðir, eiginmaður, bróðir eða sonur), sem tekur ákvarðanir eða veitir leyfi fyrir ýmsu í lífi þeirra. Í sumum tilfellum, þar sem kona er ekkja, getur forráðamaðurinn verið sonur konunnar. Sonurinn hefur þá vald til að taka ákvarðanir fyrir móður sína.

Upplýsingum um forráðamannakerfið í Sádi-Arabíu (sjá bls. 9) er dreift til þátttakenda og þeim gefinn stuttur tími til að lesa.

Þátttakendur eru beðnir að hugsa um eftirfarandi:

- Hvaða mannréttindi gætu verið brotin í þessu forráðamannakerfi?
- Af hverju haldið þið að þetta forráðamannakerfi sé við lýði í Sádi-Arabíu og hvað er hægt að gera til að tryggja konum jafnrétti?

Eftir nokkrar mínútur eru fengin svör frá hópnum. Dæmi um þau mannréttindi sem gætu hugsanlega verið brotin með notkun forráðamannakerfisins eru réttur til tjáningar og hugsana, réttur til frelsis og ferðafrelsi.

*Ef þetta er í fyrsta sinn sem þátttakendur kynnast mannréttindum væri gagnlegt að dreifa einfaldaðri útgáfu af Mannréttindayfirlýsingu Sameinuðu þjóðanna og nýta stuttan tíma í umræðu um hana til að skapa sameiginlegan skilning hópsins á mannréttindum og mannréttindayfirlýsingunni.*

## 3 SAGA NASSIMU

🕒 20 MÍNÚTUR


Þátttakendur eru upplýstir um að baráttufólk fyrir mannréttindum hafi barist fyrir kvenréttindum og talað gegn forráðamannakerfinu í Sádi-Arabíu í áraraðir og að þeir muni nú kynnast einni baráttumanneskju nánar.

Eintökum af máli Nassimu al-Sada er dreift til þátttakenda ásamt eintaki af einfaldaðri útgáfu af Mannréttindayfirlýsingu Sameinuðu þjóðanna ef það var ekki búið nú þegar.

Þátttakendum er skipt í litla hópa, þeir fá tíma til að lesa sögu Nassimu og eru svo spurðir eftirfarandi spurninga:

- Hvernig leið ykkur að lesa sögu Nassimu?
- Hvaða mannréttindabrot hafa verið framin í máli Nassimu?
- Hvernig er staða stelpna og kvenna á Íslandi? Geta karlar tekið ákvarðanir sem konur geta ekki tekið? Er komið fram á sama hátt við karla og konur? Af hverju?
- Hvað þarf að gerast til að breyta aðstæðum Nassimu og aðstæðum annars baráttufólks fyrir kvenréttindum?

Þátttakendur mynda aftur einn hóp og ræða svör úr hópavinnunni. Farið er í gegnum töfluna með réttindum sem hafa verið brotin í máli Nassimu (sjá bls. 10).



## 4 UMRÆÐUR

Umræðum er lokið með eftirfarandi spurningum:

- Af hverju eiga baráttukonur fyrir mannréttindum frekar á hættu að verða ofsóttar?
- Hvernig er hægt að grípa til aðgerða og styðja Nassimu al-Sada í að ná fram réttlæti?
- Hvernig myndi það breyta daglegu lífi kvenna í Sádi-Arabíu?

Ef tími gefst til gæti verið gagnlegt að sýna einnar mínútu langt myndband um Nassimu al-Sada sem hægt er að nálgast á Youtube-síðu Íslandsdeildar Amnesty International (AmnestyIceland)

🕒 10 MÍNÚTUR

## 5 GRÍPUM TIL AÐGERÐA!

Útskýrt er fyrir þátttakendum að Amnesty International biðli nú til fólks um allan heim að grípa til aðgerða til stuðnings Nassimu. Það getur verið gagnlegt að segja frá góðum fréttum fyrri ára og útskýra að Amnesty International hvetji fólk til að skrifa bréf til yfirvalda og sýna samstöðu með Nassimu.

Ef ekki reynist nægur tími fyrir þátttakendur að sinna öllu verkefninu í kennslustundinni væri hægt að skipuleggja hluta þess sem heimavinnu eða skipta því á milli þátttakenda.

🕒 10 MÍNÚTUR

Það er tilvalið að sýna stutt myndband um Þitt nafn bjargar lífi sem hægt er að nálgast á Youtube-síðu Íslandsdeildar Amnesty International (AmnestyIceland)

## SKRIFAÐU BRÉF OG BJARGAÐU LÍFI

- Þátttakendur eru hvattir til að skrifa konungi Sádi-Arabíu bréf og senda það til:

His Majesty King Salman bin Abdul Aziz Al Saud  
Office of His Majesty the King  
Royal Court, Riyadh  
Kingdom of Saudi Arabia  
Twitter: @KingSalman  
Ávarp: Your Majesty

Einnig er hægt að fara í gegnum neðangreindar leiðbeiningar ef þátttakendur vilja skrifa bréf á persónulegri nótum.

Segðu konunginum eitthvað sem gerir bréfið persónulegt:

- Segðu honum frá sjálfri/sjálfum/sjálfru þér
- Segðu honum hvað þér bregður mest við að heyra varðandi málið
- Segðu honum að Nassimu og öðrum aðgerðasinnum fyrir kvenréttindum skuli sleppt strax og skilyrðislaust

Þátttakendur geta nýtt tillöguna hér að neðan við bréfaskrifin.

Your Majesty.

Nassima al-Sada is a woman whom Saudi Arabia should take great pride in. Her lifelong journey has been one dedicated to the improvement of women's freedoms and her vision of them being active members of an open, vibrant society.

But instead of embracing Ms. al-Sada, the authorities arrested her in July 2018 and placed her in solitary confinement for one year. Today, she is still behind bars. I respectfully call on you to release Ms. al-Sada and all other detained women human rights defenders, immediately and without conditions.

Yours sincerely,

## SÝNUM SAMSTÖÐU

Þátttakendur eru hvattir til að skrifa Nassimu bréf og lýsa yfir samstöðu með henni eða senda henni hvatningarorð til að styðja við bakið á henni.

Nassima al-Sada er mikill dýravinnur og þykir vænt um garðinn sinn. Ef vill geta þátttakendur sett inn mynd af sér á samfélagsmiðlum í garðvinnu, af fallegum blómum eða náttúru,

eða teikningu af dýrum eða plöntum. Hægt er að nýta blómin sem þátttakendur bjuggu til í verkefninu, taka mynd af hverju blómi eða setja þau öll saman og búa til garð. Þátttakendur skrifa persónuleg skilaboð til Nassimu með og merkja myndina @nasema33 auk @KingSalman; með myllumerkinu #FreeNassima á samfélagsmiðlum.

# FORRÁÐAMANNAKERFI Í SÁDI-ARABÍU

Í ágúst 2019 tilkynntu stjórnvöld miklar umbætur á hinu ósanngjarna forráðamannakerfi; jákvæða þróun sem hefði átt að eiga sér stað löngu fyrr. Meðal annars fela umbæturnar í sér að konur 21 árs og eldri geta sótt um vegabréf og ferðast án samþykkis karlkyns forráðamanns; konur 18 ára og eldri geta skráð fæðingu barns, dauðsfall ættingja eða hjónaband eða skilnað; auk þess geta þær sótt um og fengið fjölskylduskírteini sem sannar tengsl þeirra við börn sín; og konur mega líka stjórna eigin heimili.

Þó að umbæturnar feli í sér viðurkenningu á því að réttindi kvenna séu jöfn körlum á þessum sviðum og hafi létt á takmörkunum á ferðafrelsi kvenna var forráðamannakerfið ekki lagt niður. Umbæturnar leyfa konum hvorki að giftast án leyfis forráðamanns né veita samþykki fyrir giftingu barna sinna. Konum og stúlkum er áfram mismunað á kerfisbundinn hátt, bæði lagalega og í framkvæmd, á sviðum er varða giftingu, skilnað og arf auk þess sem börn öðlast ekki ríkisborgararétt mæðra sinna.

## STAÐA MANNRÉTTINDA Í SÁDI-ARABÍU

Yfirvöld í Sádi-Arabíu takmörkuðu enn frekar tjáningar-, félaga- og fundafrelsi árið 2019. Yfirvöld áreittu, ákærðu og handtóku að geðþótta gagnrýnendur ríkisstjórnarinnar, baráttufólk fyrir mannréttindum (þ.á m. kvenréttindum), sjítamúsíma (minnihlutahópur) og fjölskyldumeðlimi aðgerðasinna. Aðgerðasinnar og trúarklerkar úr hópi sjíta voru sóttir til saka fyrir að fallast ekki á skoðanir yfirvalda. Misrétti gegn sjítum er rótgróið í landinu.

Yfirvöld notuðu dauðarefsinguna óspart og tóku fólk af lífi fyrir ýmsa glæpi, þar á meðal vímuefnabrot. Sumir sjítar voru teknir af lífi eftir afar óréttlát réttarhöld.

Hundruð þúsunda óskráðs farandfólks hafa verið handtekin, sætt pyndingum í varðhaldi og flutt úr landi. Fólkið hefur einnig mátt þola misbeitingu af hálfu atvinnurekanda.




Nassima al-Sada

© Private

Þú getur nálgast rauntímalínu sem sýnir tveggja ára herferð Sádi-Arabíu gegn baráttufólki fyrir kvenréttindum hér:

[https://cdn.knightlab.com/libs/timeline3/latest/embed/index.html?source=1iJrpiNp45E3r-QTCFy0q9JuH9rpaRJBROxrDvmrde00&font=Default&lang=en&initia\\_al\\_zoom=2&height=650](https://cdn.knightlab.com/libs/timeline3/latest/embed/index.html?source=1iJrpiNp45E3r-QTCFy0q9JuH9rpaRJBROxrDvmrde00&font=Default&lang=en&initia_al_zoom=2&height=650)



# MANNRÉTTINDABROT Í MÁLI NASSIMU AL-SADA

RÉTTINDI	Á VIÐ Í MÁLI NASSIMU
Réttur til réttlátrar málsmeðferðar fyrir dómi	Nassimu var haldið án ákæru í yfir ár og hefur ekki fengið að hitta lögmann sinn. Diplómatar, fjölmiðlafólk og sjálfstætt eftirlitsfólk hafa ekki fengið að vera viðstödd réttarhöldin yfir henni.
Réttur til mannhelgi	Nassimu var hótað í gegnum Twitter áður en hún var handtekin.
Réttur til frelsis	Nassimu hefur verið haldið síðan í júlí 2018 án ákæru og án formlegra réttarhalds; hún sætti einangrunarvist frá febrúar 2019 til byrjunar árs 2020.
Réttur til að teljast saklaus uns sekt er sönnuð	Nassimu var hótað og hún bundin við stól á meðan hún var yfirheyrð.
Réttur til tjáningar	Nassima var sett í varðhald fyrir að miðla fræðslu til annarra og krefjast mannréttinda fyrir konur.
Réttur til að teljast saklaus uns sekt er sönnuð	Nassimu var haldið án ákæru eða réttarhalds frá júlí 2018 til júní 2019. Hún sætti auk þess einangrunarvist frá febrúar 2019 til byrjunar árs 2020.
Frelsi frá mismunun	Spjótum er beint að Nassimu fyrir að berjast fyrir mannréttindum og hún er beitt misrétti í baráttu sinni gegn mismunun kvenna.
Réttur til að taka þátt í að stjórna landi	Nassima bauð sig fram í sveitarstjórnarkosningum árið 2015 en var meinuð þátttaka.

# NASSIMA AL-SADA, SÁDI-ARABÍU

Nassima al-Sada er mikill dýravinur og ræktaði garðinn sinn af natni. Hún ræktar meira að segja plöntur í fangaklefanum af alúð en það er eina samband hennar við umheiminn sem hún saknar sárlega.

Nassima hefur barist fyrir frelsi kvenna í Sádi-Arabíu stóran hluta af ævi sinni. Baráttan leiddi til þess að hún var sjálf svipt frelsi. Hún var ein af nokkrum þekktum baráttukonum í Sádi-Arabíu sem kröfðust þess að konur fengju rétt til að aka bíl og sinna daglegum erindum án leyfis karlkyns forráðamanns.

Lög í Sádi-Arabíu kváðu á um að konur bæðu karlmann um leyfi til að fara út og til ýmissa hversdagslegra athafna. Þrátt fyrir tilslakanir á þessum lögum síðustu mánuði eru baráttukonur sem böðust gegn forræði karlmanna enn á bak við lás og slá. Árið 2016 skrifaði Nassima: „Af hverju ætti piltur undir lögaldri að hafa forræði yfir fullorðinni konu? Af hverju er ekki sjálfræðisaldur fyrir konur svo þær fái að bera ábyrgð á ákvörðunum sínum og lífi? Af hverju þarf karlmaður að bera ábyrgð á lífi konu?“

Nassima var handtekin fyrir friðsamlega mannréttindabaráttu sína í júlí 2018. Hún sætti pyndingum í varðhaldi. Hún var sett í algjöra einangrun frá öðrum föngum frá febrúar 2019 til febrúar 2020. Hún fær að hringja vikulega í fjölskyldu sína en fær engar heimsóknir, ekki einu sinni frá lögmanni sínum.

Nassima segir: „Þegar kona upplifir að hún geti ekki framkvæmt einföld verk sem borgari án þess að hafa karlkyns forráðamann setur það hömlur á mannlegt eðli hennar.“

**Nassima og fjölskylda hennar hafa ekki gefið upp vonina og ekki við heldur.**



**„Þegar kona upplifir að hún geti ekki framkvæmt einföld verk sem borgari án þess að hafa karlkyns forráðamann setur það hömlur á mannlegt eðli hennar.“**

Nassima al-Sada





# UM AMNESTY INTERNATIONAL

Amnesty International er alþjóðleg hreyfing yfir sjö milljón einstaklinga sem telja að allt óréttlæti komi þeim við. Við berjumst fyrir heimi þar sem allar manneskjur fá að njóta mannréttinda sinna.

Við rannsökum atburði og segjum frá því sem gerist, hvar og hvenær sem mannréttindabrot eiga sér stað. Við beitum yfirvöld, áhrifamikla aðila og fyrirtæki þrýstingi og reynum að tryggja að þessir aðilar standi við gefin fyrirheit og virði alþjóðalög. Með því að miðla áhrifamiklum reynslusögum fólksins sem við vinnum með virkjum við milljónir stuðningsfólks okkar um heim allan til að berjast fyrir breytingum og koma aðgerðasinnnum í framhúðunni til hjálpar. Við styðjum fólk til að leita réttar síns með fræðslu og þjálfun.

Með starfi okkar verndum við fólk og valdeflum það til að berjast fyrir ýmsum málefnum, þar á meðal afnámi dauðarefsingar, fyrir kyn- og frjósamisréttindum, gegn mismunun og réttindum flóttafólks og farandfólks. Við berjumst fyrir því að aðilar sem beita pyndingum verði dregnir fyrir dóm. Við beitum okkur fyrir því að fá lögum sem stuðla að kúgun breytt og við berjumst fyrir frelsi fólks sem hefur verið fangelsað fyrir það eitt að tjá skoðun sína. Við tökum málstað allra sem búa við skert frelsi eða mannvirðingu óháð uppruna.

## AMNESTY INTERNATIONAL ÍSLANDSDEILD AMNESTY INTERNATIONAL

[www.amnesty.is](http://www.amnesty.is)

Þinghótsstræti 27  
101 Reykjavík  
Ísland

Netfang: [amnesty@amnesty.is](mailto:amnesty@amnesty.is)  
Sími: 511 7900

Október 2020  
Index: POL32/2888/2020 Íslenska

Allar myndir eru eign ©Amnesty International nema annað sé tekið fram.  
Forsíða: ©Akin Celikbas/Amnesty International  
Handritagerð: ©David Hunter

AMNESTY  
INTERNATIONAL

